

隨

園

隨

筆

隨園隨筆卷六

錢塘袁枚子才

天時地志類

改正改朔改年

或疑商人以丑爲正既書元祀則必書其歲首之月萬  
克宗以爲商書伊訓之十有二月朔實子月也崩年改  
元商制本不同於周制先儒謂商改正朔而不改月數  
者非也夏建寅商建丑周建子是改正也夏朔以平旦  
商朔以雞鳴周朔以夜半是改朔也秦建亥而仍曰冬  
十月是改年也

齊秦之厯魯之厯

管子三卯三暑三寒之令齊厯也呂氏春秋月令未行之秦厯也汲冢周書時訓解魏厯也周之分至未嘗係之以時獨大司樂有冬至夏至之名故萬克宗深以周官爲僞漢高八年楚元王之三年也律厯志中不書漢年反書楚年全謝山以爲此必劉歆之文蓋周厯之後有魯厯以魯紀年劉爲楚元後故倣其例以楚紀年

古不重望日

玉藻天子朔食太牢諸侯朔食少牢不言望日之食喪禮朔有殷奠月半不殷奠是直指望日之不重也周官冢宰司徒懸法於象魏亦只用朔日論語吉月必朝服

而朝註吉月月朔也六經明文無重望日者惟康成註  
月半不殷奠乃云大夫以上仍有月半之奠士降則無  
其殆非古經之旨乎夫月者日之配也古人扶陽而抑  
陰故祭義曰祭日於東祭月於西於月貴其明之始生  
而不貴其魄之已兆又易象言月幾望者三望而曰幾  
殆有無取其滿而戒其滿之義冬至受賀而夏至不受  
賀蓋亦貴陽而賤陰之義歟

以月紀日

古史以月之盈虧紀日者惟尙書武成有旁死魄哉生  
明之詞召誥有二月既望三月惟丙午朏顧命惟四月  
哉生魄畢命六月庚午朏

夏正或用或不用

爾風七月以后稷先公皆夏時臣故從夏正而避十一月十二月之名則日一之日二之日然先儒以爲商周改朔不過朝覲聘問耳其他總以夏正爲主左氏伐虢童謠絳縣老人語可驗詩曰四月惟夏六月徂夏皆周用夏正之証也孟子曰七八月之間旱春秋二月無冰正月日南至申須曰火出於夏爲三月於商爲四月皆周不用夏正之証也元吳草廬云春王正月者明其爲周王之正月耳其時他國必別有所謂正月也明周洪謨云周以十一月爲歲首非以爲正月也商之建丑也曰惟元祀十有二月朔稱元祀仍稱十二月不稱正月

秦之建亥也亦曰元年冬十月不稱正月一爲史官紀  
年一爲厯官紀年余按論語子張問十世註神農以十  
一月爲正女媧以十二月爲正何晏此說不知何所考  
而漢武帝後魏明帝景和元年建丑唐武后建子肅宗  
上元二年建子蓋亦不專從夏正矣

### 二十四氣

厯中二十四氣萬克宗以爲始於漢之大初厯蓋二十  
四氣在夏正則安在周正則冥隋書後齊神武霸府由  
曹參軍信都芳深有巧思能以管侯氣仰觀雲色嘗與  
人對話卽指天曰孟春之氣至矣人往驗管而飛灰已  
應每月所候言皆無爽又爲輪扇二十四埋地中以測

二十四氣每一氣感一扇自動他扇並任與灰管相應  
若符契焉周書序周公辨二十四氣之應以明天時作  
時訓唐太衍厯議七十二候原於周公時訓月令雖頗  
有增益然先後之次則同自後魏始載於厯

上巳之說互異

癸辛雜記上巳當作上巳謂古人用日例以十干恐上  
句無巳日吳才老謂辰巳之巳亦讀以古人卜日用午  
數日用支故三正建月爰定子丑四時分日乃用甲乙  
祿上丁習舞仲丁習樂傳上辛大雩季辛又雩皆其証  
也宋書曰自宋以後祓禊但用三日不用巳日以常常  
上句謂在午未則此一句已無辰巳故也謝氏王維組

則云西京雜記正月以上辰三月以上巳其文甚明已  
劉熙釋名訓作止謂陽氣之止於巳也故巳卽巳也但  
不可以支爲干耳呂知錄亦云辰爲建巳爲除故三月  
上巳祓除不祥三代以上重干如易稱先庚先甲詩稱  
吉日惟戊是也三代以下重支如漢書之吉日剛卯蘭  
亭之三月上巳是也潛邱劄記亦云蘭亭三月三日乃  
丙辰次日丁巳康熙字典亦主重支之說錢辛楣曰辰  
巳之巳與已矣之已是一字兩讀也戊巳之巳與上巳  
之巳判然不同毛西河不通小學故有一字三讀之妄  
說齊書禮志或云漢世有郭虞者以三月上辰生二女  
上巳又生一女皆死時俗以爲大忌每至其日皆適東



流水祈禱自絮濯按此条亦作辰巳而別爲一解字典引宋書禮志云自魏以後但用三日不以巳也此言自宋以後當更考之

無羊之月

筭命之書以寅午戌三月爲無羊之月以宋制官員于此三月例減祿料故曰無羊

都試之日

漢以九月爲都試日太守都尉共課最之日也集生徒講授則曰大都試

十時十位

叔孫穆子生卜楚邱之爻詞曰日之數十故有十時亦

當十位杜註日中當王食時當公平且爲卿雞鳴爲士  
夜半爲皂人定爲輿黃昏爲隸日入爲僚脯時爲羹日  
昃爲臺

日月晦朔解

吳廷耀云日月之圓缺前賢議論不同有云陽有餘而  
陰不足故望後漸虧迨至晦日卽全損矣竊以日月爲  
陰陽之精調和而成歲月絳毫不可偏損譬於人身一  
小天地陰陽稍有偏枯卽爲疾病若如晦月之全虧人  
豈復能生活耶又說月借光於日而月之缺處乃日輻  
入地月爲地所掩故有虧缺夫天雖如卵地包于內然  
常視日月星辰皆自東南北斜過於西南北似非竟由

西穿地而東也倘如前說月缺因日爲地隔所以損光是每夜日必入地矣何以十五日後至二十七八日雖有滿缺而光朗徹夜日旣入地爲地所隔月之光何以不損乎況星與月同藉光於日而星常明豈日入地之後但隔月之光獨不隔星之光乎予竊揣摩恒不釋念偶以羲孟照日恍然大悟夫日陽也其體凸如滾毬光照四方月陰也其形凹如覆盂有質無光月借光於日日居高而月居低對照則光全滿稍偏卽虧卽月之本體所遮由漸偏而至漸晦乃月背日而行故無光矣度行左右故有左右絃缺之分其旣虧之後尙隱隱然有半輪黑丸可見則是月未受日光之本體也至於日月

之食或云是日月同度相掩似屬不然倘望日月食則日當空便同白晝如何反有晦暗之理據天文別論乃羅計星同度所掩其說近理

### 三伏

史記秦德公二年初伏註三伏始於秦周無伏也劉熙釋名云金氣伏藏也故三伏皆庚王大可云三伏者庚金伏於夏火之下也金畏火故曰伏

### 測天三家以外諸說

測天者宣夜渾天昕天三家人皆知之今用西洋法則亦渾天遺意也然三家外散見各家論天地有極奇者唐書太宗收骨利幹其地夜短煮羊脾未熟天即明元

史沙弼國日入時其聲克湧國人必擊金鼓以亂之否則小兒怖死土哈國日入不滿一時隨即出地宋戴五原云嘗登崆峒之巔見日光非從海出入也太陽之氣朝則聚聚極而圓明暮則散散盡而昏黑日聚日散人離日遠故悞以其散聚爲穿地而過耳癸辛雜志云趙都統見海神黃衣赤眼以頭頂日而上日漸高人漸小本朝懷氏坤輿外記云莫斯歌國其地夜長晝短冬至之時太陽出止二時而夜矣季氏臺灣雜記云臺灣東有紅夷國中國商人某舟泊其地竟無晝夜花木明秀商大喜以爲仙境乃畱三百人裹糧居之隔年復至則山中黑如長夜人迹已絕取火照之見碑上畱字云此

國至秋而暮至春而且以一年爲晝夜也王方平云月至梁時已周圍減寸矣自開闢至唐虞已減一寸郭守敬云古日舒長今日促每百年則短一分孫太初云今日不如古日之熱邛長春云日不入地猶之星辰亦不入地三光輕清故也七八月間河漢尤顯日月東西出沒而河漢常在天周髀經筭天至二百四十八萬里而日月不照矣侯鯖錄言海中三日並出者大魚之目也

### 地有四遊

尙書考靈耀曰地體雖靜而終日旋轉如人坐舟中舟自行動人不覺耳春星西遊夏星北遊秋星東遊冬星南遊一年之中地有四遊

十三月十四月十九月

陳寵傳十三月陽氣已至牛宏傳十三月不以太簇爲  
宮便是春水不旺註十三月正月也金石錄古公緘鼎  
有十四月戊命尊有十九月殿公問貢父而不知王歷  
州以爲閏月也是齋日記以爲嗣王卽位雖踰年不恐  
改元也汪師退作史記十表言秦漢之際陳涉起陳凡  
六月武臣起趙凡四月皆繫以月而不年而其中有四  
十八月三十八月何以不年其時統無所屬不得以正  
元起數故也故管子亦有二十四月之文此說出而十  
四月十九月之說可以明矣

端午不必五月修禊不必上巳登高不必重陽除

夕不必歲除

唐宋廣平賀表曰時則仲秋日惟端午是端午不必在五月也劉楨魯都賦素秋二七天漢指閏人胥政除其時蓋七月十四日漢書八月帝與羣下祓于灊上是修禊不必三月也隋書文帝七月與羣臣登高是登高不必重陽也唐人亦有人日登高詩太平廣記盧頊傳是日冬至除夜盧家餽棗盛之具是冬至夜亦名除夕也老學菴筆記冬至前一日名爲冬住亦奇

寒食不必清明

汝南先賢傳介子推以三月三日自燔後有禁火之俗按後漢書周舉傳太原舊俗以介子推焚骸至其亡月



士民輒一月寒食舉旣到州乃作書置推廟言盛冬去  
火殘損民命非賢者之意以宣示愚民使還溫食依此  
則寒食乃在冬矣琴操言子推抱木而死文公哀之命  
人五月五日不得舉火依此則寒食又在夏矣

### 開闢不必十二萬年

元人伊世瑜鄉媛記曰天地日月之壽亦如世上人各  
有長短不齊康節所云一開一闢必須十二萬年非也

### 地理之難

地理之學極難問百詩云代有四遷寧人知其三江西  
有三寧人知其二寧人以幽并營三州在焉貢九州之  
外而百詩又引周禮職方氏所載駁之如昭餘祈在今

介休縣蕭慎氏在今寧古塔之類牧齋註杜以潼關爲唐始立而竟忘曹操之殆死潼關則真乃目不見睫耶方密之通雅載石頭城非石城龍門棧道均非一處有漢之河東唐之河東周之河內漢之河內皆不同處

### 五服

禹貢五服周職方九服蓋就賦役之繁簡王畿之遠近因時制宜略有損益其實山川藪澤爲不可移易之物非周商異於虞夏也鄭康成以爲服五百里是堯之舊制禹弼之更增五百里而五千里相距爲方萬里其說甚誕按王制云四海之內斷長補短方三千里原有明文而孔疏引地理志言漢之土境東西九千三百三里

南北萬三千三百六十八里其所以與九服五服之面  
五千里俱不合者蓋尙書所言乃據其虛空鳥路方直  
而計之漢書所言乃是著地人跡屈曲而量所以其數  
不同此說尤誕夫虛空鳥路非鳥不知三代之人非著  
翅解飛者何能憑空丈量而臆斷爲五千里哉其實幅  
員之廣三代實不如秦漢也再考唐虞之時雍州之地  
所爲導河導弱所經冀州之北並無治水之迹此二方  
者有何侯衛之可設貢賦之可稽乎且依其說則王者  
之都必長在天下之中如嵩洛汝潁地方然後均齊方  
正而五服九服可以環而向之若虞夏之都偏於北周  
人之都偏於西其北則沙漠苦寒西則戎狄流沙又安

得有五千里之侯衛耶至於東南二面又豈止於五千里耶戴未堂曰周之兗州南侵青徐大于禹貢之兗州周之青州兼徐侵豫倍于禹貢之青州周之冀州分其北爲并州分其西爲雍州合三州乃當禹貢之一冀州

### 四至不同

四至之說不同爾雅云東至泰遠西至邠國南至濮鈇北至祝栗呂覽則云東至搏水之地西至三危之山南至續櫛之國北至夏海之窮大戴禮則云北至幽陵南至交趾西至流沙東至蟠木

### 三揚州

漢以廣陵郡屬徐州今之江都也其揚州刺史或治歷

陽卽今之和州也或治壽春卽今之壽州也杜詩之何遜在揚州蓋指爲建安王記室時今之金陵也隋開皇九年改梁之南充州爲揚州置總管則今之江都矣禹貢揚州之域所統甚廣晉書隋書均以交廣爲禹貢揚州杜佑非之以三代時尙無南越而不知堯典之宅南交卽交趾也故史遷舜本紀有北發息壤南撫交趾之語至于北朝所僞置之揚州則更紛攪矣

### 五赤壁

今江漢間稱赤壁者有五漢陽也漢川也黃州也嘉魚也江夏也東坡指黃州赤鼻山爲赤壁按劉備居樊口迎操軍於赤壁則赤壁當在樊口之上又赤壁初戰操

軍不利引次江北則赤壁又當在江南矣

### 三曲江

曲江有三枚乘七發觀于廣陵之曲江今浙江也廣東有曲江今韶州也司馬相如弔二世賦臨曲江之墮州今長安也曾鞏鑑湖圖有所謂廣陵斗門者在今山陰縣西六十里江都更名廣陵在元狩三年其時枚乘已卒不應見之於文至元年間試羅刹江賦獨錢惟善以錢塘江爲曲江遂冠三千人之上見升菴外集

### 徐揚可稱閩中

今閩中爲福建然傅亮從武帝平閩中詩曰鞠旅揚城大蒐徐方是徐揚亦可言閩中梁元帝去丹陽尹荊州

詩曰分符蒞閩越終然慚厲精是荊州亦稱閩越華陽國志稱哀牢歸義其地東西三千里有穿胸儋耳閩越云云是今之雲南亦古之閩越也錢辛楣曰宋武並未入閩傅亮從武帝平閩中恐是閩中之訛

江河發源

禹貢有岷山導江之文而後之論水者遂以岷山爲江源桑經酈注皆主其說自前明徐霞客好遊直至崑崙見河與江皆出自崑崙不過河源在北江源在南耳岷山者乃其入中國之始而非其發源也有以北金沙江爲江源者其源在西番境內莫得其詳李穆堂以康熙方輿圖考之岷山與金沙江會合于四川之敘州自敘

州逆而數之直發源于西番之阿克達母必拉等處蓋  
六千九百里而后至岷山幾與黃河同源徐楚金作說  
文繫傳言河出崑崙崑崙神靈之宅帝之下都非造次  
可觀蓋在元以前未窮河源到星宿海處故也豈大禹  
之力不如一元人哉天地之鑄必至此而始開也沈括  
筆談云溫州雁宕山前人未見故謝靈運爲太守未曾  
一遊至宋真宗修昭應宮采木入山此境始露於外可  
知天下境界無窮學問之道亦然安見前人言之而後  
人不可再置一說耶儲六雅曰庚桑子洞顯于周仇池  
顯于晉雁宕顯于晚唐黃山顯于明末

二百里蔡



二百里蔡孔傳以爲殺滅其稅二百里流爲流移而隨其俗蔡傳俱以爲罪名愚意孔說爲是唐虞以流宥五刑似流爲最輕之罪安得流諸荒服之外故曰流共工於幽州幽州非荒服也

地名通用

棘闢楚地也見左氏昭公十三年而今以爲貢院試士之所九京晉地也在京陵縣見水經註今以爲死者九泉之通稱太原平陽地之通稱也見孔傳而今以爲山西之太原府平陽府杏壇澤中高處之通稱也見司馬彪莊子註今指定爲孔子講禮之所蠶室魯地也見左氏哀公八年吳伐魯舍于蠶室後人以爲受宮刑之所

地名所由

虎牢者穆天子傳七萃之士禽虎而獻之天子天子命爲押畜之東虞是名虎牢餘干者梁武時童謠王氣在三餘乃置餘干縣金山者唐有僧獲金江中因而建寺猶之始皇埋金建業故名金陵也俱見九域志任昉述異記云吳人買瓜于江畔故曰瓜步水際曰步湘中有靈妃步是也句容山形曲而有容故曰句容見真誥望都者謂登堯山望見都也見地理志邯鄲盡也言邯山至此而盡也見寰宇記楊關者漢將楊興敗逃出此關故曰楊關見清波雜志孫權記註云昌門者夫差以吳門上通天闔故號城門曰闔門見括地志漢封真人

匡續爲越廬君以其所廬處故也後遂名其山爲廬山  
與焦山之名因焦先所居同義匡字君孝見杜陽雜編  
章懷太子注錢塘二字始于漢人華信築塘以錢易土  
故名錢塘世說注以爲沈信所築二姓殊不相符按史  
記始皇至錢塘臨浙江早有錢塘之名在漢之前矣良  
常者秦始皇曰巡狩之樂莫如山海自今以往良爲常  
也餘杭者禹杭之訛杭舟也言大禹至此舍車而登杭  
也見地理音釋奔牛者梁武帝掘鍾山得一僧於龕中  
僧坐不動寶志公曰此入定僧也可以磬醒之遂起而  
走遁之至丹陽四十里化爲牛奔去見白醉瓊言丹徒  
者秦始皇命赭衣人三千鑿山以斷王氣遂名丹徒會

稽者禹王于此朝諸侯會計天下之財幣故曰會稽見  
咸淳臨安志孔廡東南有雙石關故名關里見水經註  
彭祖二子長曰武次曰夷所居山遂名武夷見武夷山  
志太湖得咸池五車之氣故名五湖見陸魯望集

### 三吳三解

通典漢分會稽吳興丹陽爲三吳水經以吳興吳郡會  
稽爲三吳指寧國以蘇州常州湖州爲三吳

### 五湖五解

虞翻以太湖通五道又上通咸池五車之氣故號五湖  
其實一湖也猶之昭餘祈雖名九澤其實一澤也然水  
經五湖有長塘湖射湖貴湖上湖滬湖六湖之分吳越

春秋又有貢湖游湖青湖梅梁湖金鼎湖之分韋昭以  
胥蠡洮滬四湖及具區爲五湖合之前陸魯望所言是  
五解矣

馬嵬本人名

學圃萱蘇云馬嵬晉人名也昔人在此地築城避兵後  
因以名其地而以楊妃一死遂大著于天下

臺城

六朝朝廷以禁省爲臺故稱官軍爲臺軍禁城爲臺城  
法令爲臺格使者爲臺使猶之昔并州刺史治太城蜀  
郡太守治少城便稱太城少城云爾

雁塔

佛家三淨食雁也。續也。鹿也。永徽三年元奘僧造塔于宮城南。見雁飛過。戲曰。衆僧缺供。一雁應聲而墜。衆曰。此雁捨身宜旌彼德。遂不食三淨而瘞。此塔名曰雁塔。題名者僧道士庶皆有之。不止進士也。見震澤長語。

### 兩水精宮

閩廬造水精宮。見述異記。卽今之蘇州也。後楊漢守湖州。詩有清光合作水精宮之句。從此湖州亦稱水精宮。

### 蜀無眉山

邛州牧楊宏度云。人稱三蘇爲眉山。蘇氏考之蜀中志。書無所謂眉山者。一日登城望遠。見萬山橫秀。皆如列眉。方悟眉山與眉州之稱。今誤以州署後小土岡當之。

者非也

吳興非湖州

江淹傳淹爲吳興令今之浦城也三國志吳以浦城爲  
吳興唐改爲浦城故文通詩曰長望竟何極關雲連城  
邊其爲今之閩省所屬無疑顏魯公作妙喜寺碑竟以  
吳興爲湖州悞矣別賦送君南浦傷如之何正指浦城  
而言非今之江浦也

隨園隨筆卷七

官職類 上卷

錢塘袁枚子才

六朝尚書臺有二書體

六朝宋齊之間尚書臺文檄有二體召人用虎爪書告  
下用偃波書取其不能倉猝書成所以仿姦僞也見宋  
子京筆記

領行兼假之分

漢官以上兼下曰領霍光以大將軍領尚書事是也以  
下攝上曰行韓安國以御史大夫行丞相事是也以本  
官任他職曰兼常惠以右將軍兼典屬國是也暫署曰



假趙充國爲假軍司馬是也

### 爵官職秩之分

爵者公侯伯子男也官者宰相尙書也職者一品至九品也秩者光祿大夫至文林郎也俸之深淺亦曰秩

### 古無教官

古有大司成大司樂主教士之責其庠序學校之在鄉者其師皆致仕之大夫歸老于鄉者爲之教授不別立官有類今之掌教書院者是也漢人校官碑所稱潘君諱乾字元卓者先佐上郡再除曲阿尉以其能興文教而歌誦之非今之教官也宋慶厯始命天下小州小縣皆立學而設官以教焉朱子記漳州教授廳云官雖有

統而其任之本諸身者非期會簿書之可考上之人又以其儒官而優容之故仕者反利焉魏志武帝紀興平八年令郡國各修文學縣滿五百戶置校官選其鄉之俊秀而教學之校官之設蓋始于此

### 唐宋銓選

唐選官有小選東選南選之分小選者凡流外兵科禮部舉人得自主之東選者應選之人集于洛陽就近銓選南選者因嶺南黔中太遠遣郎官御史爲選補使至其地選之其州縣官亦不由吏部選授聽彼處都督辟上人而用之宋神宗八年詔川陝閩廣八路之人免其赴選令轉運司立格就註而已皆爲體恤遠人之意

勲階封號食邑實封之分

宋大臣有勲階封號之分階者如程琳碑贈太師尚書令本階開府儀同三司是也勲者上柱國廣平郡公是也封者封七千四百戶是也賜號者推誠保德守正翊戴功臣是也餘皆倣此其食邑與實封有別者如余襄公食邑二千六百戶實封二百戶是也唐之實封可以食其租稅至宋皆爲虛名封號起于唐明皇與肅宗德宗如賜號開元功臣寶應功臣之類

小門下

六朝呼侍中爲門下省故給事黃門侍郎呼小門下賜金紫非本秩

光祿大夫銀印青綬南齊樂安任遐爲光祿大夫向王宴乞一片金宴爲啟上賜以金紫所云賜者非其本秩應有之章服也故凡書賜紫金魚袋及賜銀青賜緋者皆沿此例紫綬則金魚袋青綬則銀魚袋

### 相國尊於丞相

吳仁傑兩漢刊誤補遺言百官表蕭何爲丞相七年遷爲相國何傳又言使拜丞相爲相國史記秦惠王拜張儀爲相又以樗里疾甘茂爲左右丞相是丞相者佐相國之名相國尊於丞相也

### 尙書令尊於尙書

東漢百官志尙書令千石且云在孝武時宦者職耳成

帝才用士人故周堪以尚書令陞光祿卿在漢時不甚尊至六朝而其職漸重唐六典尚書令正二品六尚書其屬也皆三品又置左丞一人右丞一人從二品是尚書令尊在丞相之上卽秦漢之相國也淳化三年詔升尚書令在三師之上大臣薨而贈尚書令者必兼他官惟韓魏公以功大獨得單贈此其証也

唐宋正一品皆贈官

唐宋正一品者只太師司徒司空太尉皆贈官耳或以太師致仕或以太尉致仕或死後加贈非現任也如其起用則反落免之如元豐元年文彥博落太師致仕平章軍國重事

領錄尚書事更尊于尚書令

漢武時霍光領尚書事章帝時以太傅趙熹太尉牟融並錄尚書事尚書有錄名自熹融始蓋卽虞舜大麓之職也和帝時太尉鄧彪以太傅錄尚書事位上公在三公之上每少帝立則置此官猶古冢宰總已之義也宋書褚淵傳太祖崩遺詔以淵爲錄尚書事江左以來無單拜錄者有司疑立優策王儉有策而不優之義淵表稱總錄之任江左罕授蓋尊之至也隋書錄尚書一人位在尚書令之上

太史公位在丞相上

衛宏漢儀注以太史公位在丞相上天下記書先上太

史公云云晉灼非之以爲百官表所無也史遷亦自謂  
先人文史星厯近乎卜祝之間則位在丞相上之說可  
疑于文定公以爲位者朝著之位非爵位也如唐宋螭  
頭記注之制在人主左右耳故不見于百官表而見于  
儀注也太史二字見尙書立政篇

尙書侍郎古不甚尊有遷縣令者

周官司會康成註云若今尙書矣秦世少府遣吏四入  
在殿中主發書故謂之尙書尙者主也漢有尙衣尙冠  
尙浴尙席尙書謂之六尙官六人俸六百石李固有北  
斗喉舌之稱以其出納王命故耳官不甚尊非今之所  
謂尙書也以六曹尙書當周之六官始于武后光宅元

年以天地四時分六部故通典已有六部之條侍郎乃掌守門戶之名有儀郎侍郎中郎郎中之分比四百石蔡質漢儀曰尙書郎初從三署詣臺試箋奏初上臺稱守尙書郎中歲滿稱尙書郎三年稱侍郎揚雄爲侍郎乃三署郎非尙書郎也恰從此員推升侍郎五年遷大縣令尙書郎只五品初以令史久缺補之光武參用孝廉故丁邯寧受杖不肯補郎恥以孝廉補令史之職故也西漢侍郎千餘人東漢三十六人一尙書領六郎光武時尙書之權已重所謂不任三公事歸臺閣者章懷太子注云臺閣謂尙書也其後以侍郎貳尙書亦自唐始



## 稱令公

新唐書郭子儀傳子儀爲中書令人稱之曰郭令公白居易有寄獻北都留守裴令公五言四十韻首二句云天上中台正人間一品高自註中書令上應中台司徒官一品按此以中書令而稱令公宋楊業由雲州觀察使贈太尉大同軍節度使未爲中書令而亦稱令公何也明一統志載楊令公祠在密雲縣古北口祀宋楊業

## 平章事非本職

唐平章事雖宰相之官名而非其本職也有以侍郎平章者有以尙書平章者至中書令領平章事而極尊故稱曰令公

御史有不主糾察者

監察御史主糾察而侍御史則主藏書冊老聃曾爲此官不司糾察按通考侍御史卽周之柱史漢之太史是也非御史臺之御史也如後世有給事中之名而不司官禁有司馬之名而不司兵有太常之名而不司音樂

署理

今官有署理實授之分其來最久楚漢春秋曰會稽假守殷通項梁所殺者假卽署也

柱史二解

老聃爲周柱下史故御史稱柱史一解也通考云御史冠以鐵爲梁柱故號柱史亦號端公又一解也

長史

漢制一宰相兩長史又邊防郡守亦有長史是長史者  
似是掾屬之官唐劉濟爲都督府長史是都督亦有長  
史矣元稹爲虢州長史豈州縣亦有長史歟

以降爲尊

杜詩辟大司馬府由公府掾三遷爲侍御史安集洛陽  
以狀聞世祖賜棨戟往河東翦滅諸賊乃拜成臯令以  
御史作令也陸遜爲大將軍立功後孫權欲其出身之  
正乃使鄉里重辟舉爲秀才以大將軍作秀才也二事  
極相類皆以降爲尊寵又陳書司馬申以戎昭將軍爲  
江乘令

## 學士

蕭梁有壽光殿學士之號爲學士之始中宗采上官婉兒之言設宏文館學士親近陪宴以至權重於宰相李鄴侯陸宣公皆爲之明洪武初仿宋殿閣學士之制設華蓋殿學士等名不過五品備顧問而已自胡維庸作相敗後屢召學士解縉等咨詢而權遂重永樂時至加師保

## 大學士

李泌傳肅宗加集賢殿崇文館大學士泌言學士加大始于張說已不敢當乃以學士知院事至崔圓加大學士而引泌爲辭宋設集賢殿大學士一人以宰相充之

丁謂爲資政殿學士在翰林學士下帝乃加大字班承旨上然則大學士之尊久矣

### 侍讀

唐明皇無人問古盧懷慎薦馬懷素爲侍讀此侍讀二字見史傳之始

### 都都知都都統

唐相王鐸官拜都都統樂工李可及官拜都都知蓋因僖宗奏樂召都知三十人並進無所統攝乃別立都都知王鐸之官名實始于此可見

### 奉憲

史記三王世家百官奉憲各遵其職漢書景帝紀酷吏

奉憲失中按穆天子傳受勅憲注云憲教令也

### 黃堂

黃堂二字見東漢書郭丹傳註太守之廳也郡國志曰  
雒陽之側黃歇假居之地屢有火災太守塗雘黃以厭  
之故曰黃堂

### 主事是吏非官

或問黃梨洲宋官名有某部主事否梨洲云宋制六部  
自尙書以下只有侍郎郎中員外郎三項其主事錄事  
令史書令史皆吏也而非官凡三省樞密皆有之不獨  
六部也日知錄曰主事始于後漢光祿勛有南北庭主  
事其職掾史也隋有主事令史員

總督

總督二字見漢書西域傳替曰總督城郭三十有六陳書蕭摩訶傳吳明徹曰步軍旣多吾爲總督必身居其後此總督二字之再見者

刺史

古刺史一官最爲不倫忽輕忽重大抵漢之刺史以六百石而糾二千石居無定所似明之巡按也魏晉刺史統轄數州兼領軍務似今之總督也隋唐刺史則今之知府知州也

監司

監司二字始于徐邈與范甯書擇公方之人以爲監司

見晉書

郡縣忽大忽小

三代縣大而郡小故曰上大夫受縣下大夫受郡又曰縣有四郡黜國縣小而郡大甘茂曰宜陽大縣其實郡也晉制不宰縣者不得入爲臺郎任至重也故北魏孝文以此官與崔亮後嗣君失政以廝役爲之士人不屑元文遂力除此弊乃集于神武門唱名慰諭之宋寧宗慶元年間詔改官必作令謂之須入除殿試三名外雖宰相子無不宰邑邑令又重矣唐語林以得縣令爲得畜生道以得學博爲入餓鬼道豈非忽大忽小之証歟

元知府或有或無



或問黃梨洲元官名有某府知府否曰元制諸路設總  
管府達魯花赤之下爲總管總管下爲同知治中判官  
散府則達魯花赤之下置知府或府尹若揚州杭州皆  
爲上路有總管而無知府所謂達魯花赤者國言荷包  
壓口取管轄之義稱州達魯花赤曰監州縣達魯花赤  
曰監縣

### 制府

今稱總督爲制府制府二字見宋史李全傳中以宋有  
安撫制置使之官故有制府制閫之稱許國爲此官命  
全參謁全曰不參制府則曲在我幕府章夢先亦令屬  
簾貌喏貌喏者大槩今之請安也

## 功曹

劉貢父言蕭何不爲功曹而子美有功曹非復漢蕭何之句按漢書本無何爲功曹之語三國志虞翻爲策功曹策曰孤有征討事未得還府卿復以功曹爲吾蕭何守會稽可耳此子美所用也時子美在梓州補京兆府功曹

## 移文

今文書平行者號秘文初見三國志王肅傳薛夏爲移書丞以公事移蘭臺蘭臺自以爲臺也而秘書署耳謂不得用移文夏報曰蘭臺爲外臺秘書爲內閣臺閣一也何不可移之有事物紀原以移文爲始于劉歆移太

常博士予按左氏王子朝之亂晉命諸侯輸周粟宋樂  
大心不肯士文伯折之乃受牒而歸所謂牒者卽今之  
移文也

致仕官朝參

貞觀二年特詔致仕官朝參在本品現任官之上余宰  
江寧乞病與現任江寧令同見藩司余坐現任之下藩  
司李渭大以爲非亦猶行古之道也

吳志

吳志司馬巾以戎昭將軍爲江乘令業已奇矣陸遜以  
大司馬出兵成功封侯而歸至上執鞭百僚屈膝而仍  
歸鄉里舉秀才尤奇

告身

唐告身卽今之告勅天寶初官爵濫而米粟貴所以有將軍告身易一醉之語顏魯公自書告身墨迹余于尹文端公處猶及見之

未入流

唐時流外卽今之未入流張元素流外出身故被太宗問出身而自覺慚惡面如死灰黃幡綽見醉人卧池側告文宗曰此令史也問何以知之曰再一轉便入流文宗大笑通考唐時每歲進士明經出身者不過百餘人流外二千餘人

領侍衛內大臣

史記弟子傳注王肅曰子路爲孔子侍衛故人不敢有惡言侍衛二字見此元有官名云都赤者侍衛最親雖宰相見無此人侍立不敢見卽今之領侍衛內大臣也語見輟耕錄至元史所稱怯薛則今之侍衛矣

巡撫總河總漕都統

巡撫二字始見于晉咸寧中詔劉頌巡撫荆楊唐高宗以薛元超爲河北道大使分道巡撫都統之名始于晉書苻堅以秦州主簿趙盛之爲少年都統總漕之名始于明太祖之命吳楨總河之名始于永樂之用陳瑄明之總督提督皆御史差也差畢回院乃自部卿藩臬陞授蓋卽唐之大總管大都督類也見續通考

說書

今之說演義小說者稱說書賤人所爲如左寧南門下柳敬亭是也不知宋金元皆有崇政殿說書之官其職有類經筵講官而秩稍卑程伊川楊龜山游酢皆爲此官

唐制節度觀察二使不並置

唐制節度觀察二使不並置故節度常兼觀察處置等使崔珙爲鳳翔隴州節度觀察處置等使而奏周公祠靈泉狀中書門下奏內但稱觀察使不稱節度者節度權雖重于觀察而非軍旅之事陳奏止稱觀察唐人章奏之式如此

織造府

貢禹奏故事齊三服官輸物不過十筭註三服官主天子衣服者卽今之織造府百官表有東織西織二官是也但前明洪武至宣德尙無此官見楊廷和傳

縣佐非縣丞

今人以縣丞爲縣佐不知唐官制縣丞簿尉之下尙有四佐一司功佐一司倉佐一司兵佐一司戶佐皆名縣佐

貤封非古

禮夫尊於朝妻貴於室雜記大夫之適子服大夫之服又曰士之子爲大夫則其父母勿能主也使其子主之

註大夫之子得用大夫之禮故爲喪主若父身是士不得用大夫之禮故不爲喪主漢以前爵不上逮也自南北朝始有封贈其祖父之例而自父以上官以差殺未如近制之隆郭令公二十四考中書令而父止贈太保權文公官宰相而其祖止贈郎中漢置武功爵官首補吏與今之例畧相似然爵僅得第八敘樂卿止耳說見姜西溟張主事墓志

縣令非令尹

左氏宣十二年莫敖爲宰註令尹也上卿也令尹子文三仕爲令尹是也今稱縣宰爲縣令者借用宰一國之義而其實非也



漢宗伯非禮部尙書

平帝元始五年詔宗室有寃者得因宗伯以聞晉灼曰是宗正也非大宗伯也

漢司空非工部尙書

陳咸傳咸爲南陽太守犯法者輒論輸府以律程作司空師古註司空主行役之官也非大司空也余按儀禮大夫之家有司馬司寇其卽此義歟

宋知某縣事非縣令

宋大縣千戶以上選朝官知小縣三千戶以下選京官知蓋以京朝官之銜知其縣非外吏也縣令則古長史之職如歐公之貶夷陵令是也見續通考

## 京朝官之分

常不解宋官制有京朝官之分後闕王得臣塵史云宋進士出身爲著作左郎餘人爲大理寺丞者曰京官若左郎再遷秘書丞寺丞再遷太子中舍曰朝官便奉朝請選人作今日某縣令京官以上曰知某縣事

## 協辦

今之協辦大學士卽宋之參知政事唐之同平章同三品也宋太宗患趙普之專問陶穀次宰相之官穀引唐之參知政事以對而不引漢之御史大夫人以爲非然其初參知者不押班不知印不升政事堂殿庭特設專位署銜而已至道元年詔與宰相輪班知印同升政事

堂行則並馬自冠準始

官銜

家語禮運篇官有銜職有序注銜治也執轡篇云善御馬者正銜勒善御民者正百官官銜之名本此封氏見聞記官銜之名當是選曹補授須存資歷聞奏之時先具舊官名品于前次書擬官于後新舊相銜不斷故云錢希白南部新書亦云官銜者取其相銜不斷之義如馬之有銜也

帖黃

唐制降勅有所更改以紙帖之謂之帖黃蓋勅書用黃紙則帖者亦黃紙也今奏狀劄子皆白紙有意所未盡

揭其要處以黃紙別書於後乃謂之帖黃蓋失之矣其表章畧舉事目與日月道里見于前面及封皮者又謂之引黃見石林燕語宋史中書省大事奏稟得旨者曰畫黃小事擬進得旨者曰錄黃徽宗時吏惰不勤凡命令之出于門下者預列銜使書名而徐填其事謂之空黃見張叔夜傳今人具奏自摘大旨用白紙帖之亦名帖黃始于崇禎元年三月

古官尊卑不一

秦漢侍中本丞相史不過掌虎子捧唾壺等事而晉以後之侍中乃宰相也南朝選貌美者爲之以何偃阮瞻爲一隻似又與漢相似唐同平章事處資淺之人在同

三品以下而宋則以同平章事爲正相參知政事次之漢中書令不過宦者所爲而六朝遂爲正相郭子儀力辭此職以爲太宗曾爲中書令唐樞密使亦宦官也五代郭崇韜安重誨領之遂改爲宰相之要任大抵古小而今大者尙書侍郎也古大而今小者檢校提舉也

### 漢儀同三司宋三司五司

漢安帝以鄧騭爲開府儀同三司三司者司徒司空太尉也別開一府同此三司故曰儀同三司宋之三司則專管財賦一鹽鐵使一度支使一戶部使也有副使有判官五司者經畧使安撫使節度使觀察使及總管是也號五司廳唐節度皆兼觀察處置三使宋則以節度

歸總管司觀察歸安撫使處置歸經畧使

古內外官時輕時重

漢陳咸思入京城楊僕恥居關外齊茹法亮爲中書舍人出爲大司農戀職而泣唐班景倩入爲大理寺少卿李若水送之日班生此行無異登仙似朝廷官制重內輕外由來舊矣乃天寶間薛邕貶左丞爲歙州刺史家人畏降之晚崔祐甫任兵部員外求爲洪州別駕賓佐有忤意者薦爲臺官其當遷臺閣者皆以不赴取罪南朝趙倫之居方伯公私俱足入爲護軍頗苦貧窘以爲貶也元載以仕者多樂京師惡其逼已乃制俸厚外官而薄內官常袞奏之始加六千緡後漢郭威以樞密使

過洛陽平章王守恩留守西京以使相自處肩輿出迎  
威憤之卽日以頭子命白文珂代之守恩方坐館待見  
而吏已報新留守視事于府歐公以爲武臣易一宰相  
如更戍卒古內外官之忽輕忽重如此

唐翰林學士最榮

唐學士入直許借飛龍廊馬白香山贈錢翰林詩曰分  
班皆命婦對苑卽儲皇蓋最親宮禁也是以韋綬學士  
也而覆以蜀額之袍韓偓學士也而暗藏金蓮之燭後  
蜀王建待翰林過優人尤之建曰我昔直禁軍見唐天  
子待翰林之厚雖朋友不如也我不過萬分之一耳

古中書舍人最尊

唐之中書舍人宋之知制誥皆就省中起草故韋承慶下筆立成鄭畋動無疑思人以爲才和嶮閉戶精思劉濤遣兒代草人以爲不才富鄭公直制誥竟封還劉從愿妻封遂國夫人之詞頭權可謂重矣

### 部胥

令六部書吏漢之都令史也秩雖二百戶皆士人爲之而有志者所不屑故梁冀怒名儒劉常召補都令史以辱之南朝陸慧曉曰六十之年不能咨都令史爲吏部郎也職雖卑其權之重則由來舊矣曰令史曰書令史書令史者卽今之帖寫矣

### 小史



古樂府十五府小史小史似令史之年輕者卽今之小  
書辦也張翰有周小史詩謝惠連有贈小史杜德靈詩  
似乎褻狎然吳祐舉孝廉乃越道其雍邱小史黃真歡  
語移時則小史又以人重矣高俅爲東坡小史後見蘇  
氏子孫執禮猶恭

典使

張曲江曰牛仙客河湟一典使耳使班常伯天下其謂  
何典使何稱蓋亦胥吏耳

僕射自魏晉始尊

僕射一官秦漢時侍中尙書博士郎皆有此官在永巷  
者曰永巷僕射在軍屯者曰軍屯僕射又有謁者臺僕

射以射稱者所以重武事也秋比千石東漢尙書僕射一人六百石獻帝分置左右僕射建安四年榮邵爲左僕射卒祔贈執金吾是僕射在兩漢時不甚尊也自魏置僕射掌大拜授及百官班次統謁者十餘人從此迄于六朝此官遂尊僕射上表疏只稱名不稱姓唐時左右僕射二人從二品掌統理六官爲尙書令之貳令缺則總省事所謂令僕是也五尙書二僕射一令謂之八座宋徽宗詔曰前代以僕臣之賤充宰相之任可改左僕射爲太宰右僕射爲少宰